

清光緒朝中日交涉史料

卷廿五之卷廿六
二十年

清光緒朝中日交涉史料卷廿五

(二〇四七)直隸總督李鴻章查覆旅順失守詳細情形摺

光緒二十年十月二十八日

革職留任大學士直隸總督臣李鴻章跪奏爲查明旅順失守詳細情形恭摺覆陳仰祈聖鑒事竊臣接據登萊青道劉含芳自烟台來電知旅順於二十四日失守當卽轉電總理衙門代奏自請從重治罪仰荷聖恩不加重譴僅予薄懲感愧悚惶因知所措欽奉諭旨將詳細情形迅卽查明覆奏茲於二十七日亥刻復據劉含芳電稟由輪船救出溺水之記提督黃仕林水雷營幫帶官孔玉祥何青雲及雷兵七人送至烟台詢悉所言與前電相同而情事較爲詳細據稱二十四日辰初賊由水師營後路山溝繞至韓家溝衝汝成陸路行營礮台未及開礮及闖進次至程元和礮台開二十餘礮賊已攻入徐邦道在操場接戰放三排槍亦退戰至教場溝被圍趙懷業見三礮台已失發號出隊人未及齊卽向東行各敗隊皆向東山衝打未正棉藥庫被礮擊燃申初軍械庫水師藥庫穀軍坐營及附近礮台營盤村莊舊水師營皆火起賊遇人卽殺東岸各台午前放礮不斷西岸各台申初猶有礮聲等語二十八日子刻又接到劉含芳電北河船主古巴自旅回稱二十六日午後三點鐘達望小平島尙在鏖戰又有弁兵稱徐邦道教場溝被圍皆老隊死剩十餘人猶戰不已等語

丑刻又接宋慶電稱徐邦道及毅軍營官胡永清淮軍營官吳長純馬步步勇約二三百人零星闖出面稱敗退隊伍共約萬衆賊重重設防徧布雷礮盡被擊散又值海潮驟漲北風凜冽得脫者百不及一等語臣查旅順一島孤懸海中所築礮台專爲備擊洋面敵船而設若論防守周密必須於後路金州一帶設立重兵當無事時莫不以爲過計且實無此財力此次倭兵於金州東北之皮子窩登岸本非旅順海口守台兵將所能遠防賊已襲據金州則大連灣旅順俱成絕地前因平壤事急無兵可調又將久駐該兩處之銘軍毅軍相繼調出其填紮者除旅順守台之親慶六營外餘皆新募所用毛瑟槍及舊礮不如倭兵之小口徑快槍及連珠快礮子路遠而且速又操練未熟心志不固大連灣旣失旅順更不可支諸將以新軍當巨寇猶能堅守旬餘屢戰獲勝終以宋慶程之偉等援師懸遠賊來愈多推原其故實由衆寡不敵精械懸殊傷亡枕藉尙非戰陣不力現各將領惟黃士林業經救出徐邦道業已衝出餘尙不知下落據孔玉祥等稱敗退後俱向東山衝打英船主稱二十六日尤見小平島鏖戰該島正在旅順之東俟查明再行續報現在岫巖旅順相繼不守北而遼瀋東而山海關內外沿海一帶防軍均甚單寒臣昨電請飭宋慶速卽拔隊由熊岳海蓋一路會合章高元等迎剿岫巖股匪截其北竄是晚接奉電旨當卽恭錄轉電欽遵臣當督飭

榆關蘆台以東各營將弁嚴密守禦冀固畿防臣於拜摺後卽親赴大沽北塘各處察看妥籌布置不敢稍涉疎虞仍隨時電達總理衙門轉奏所有查明旅順失守詳細情形理合繕摺由驛五百里覆奏伏乞皇上聖鑒謹奏光緒二十年十一月初一日奉硃批覽奏均悉欽此

(二〇四八)署理福建臺灣巡撫布政使唐景崧奏續布臺防情形摺

光緒二十年九月三十日

頭品頂戴署理福建臺灣巡撫布政使臣唐景崧跪奏爲續布臺防益求完備恭摺密陳仰祈聖鑒事竊臺灣自聞倭警所有增營設備情形歷經前撫臣邵友濂奏明在案查倭人雖鴟張於北而志不忘臺六月以來時有倭輪游弋測水故臺灣設防與臨敵同南路於霜降後湧浪漸平與澎湖並形喫重恆春縣自大港口以迄鳳山枋寮百有餘里昔爲倭人盤踞半載有餘蹊徑旣諳舊奸尤有礮臺未設海岸易登該處防營尙單又無大員統率誠恐敵人承虛就熟不可不加意嚴防幫辦防務南澳鎮總兵劉永福與臺灣鎮總兵萬國本並駐臺南郡城遙顧恆春鞭長莫及茲商以萬國本專防安旂一帶劉永福專防鳳山東港至恆春一帶該兩鎮臣相去僅百餘里間事機則仍可互商部曲則不妨劃守庶幾各有責成惟

劉永福僅帶兩營不敷展布商屬派員回粵增募四營恆春至東港防營均歸節制以一事權酌裁疲卒藉抵新募餉需此續布南路防務之情形也從來爭臺者必首爭澎湖以澎湖可泊數十艘踞之足爲巢窟我能保澎湖敵難寄碇游行洋面勢不能長困孤臺而難守者莫如澎湖宮西嶼兩島對峙中隔海程二十里現止勇練八營斷難兼顧茲調駐紮滬尾候補知府朱上泮率帶四營並募礮隊前往協防又開水旱雷一營擇要分置該地不產薪米一切糧餉軍裝非及時寬爲儲備臨警則接濟無從現惟竭力源源運往此續布澎湖防務之情形也中路臺灣府爲南北樞紐港口深者約二三處該處民情浮動舊有勇營分紮僅能彈壓必須有堅整之軍方可扼守海口茲將現有四營汰弱補強併散爲整調取福建候補道楊汝翼以爲統領重新壁壘用壯聲威不欲使臺島中權稍留罅漏此續布中路防務之情形也以上皆近日陸續籌辦海外輪稀物缺措置艱難至速亦須兩月方能就緒基隆爲臺北門戶臣與提臣楊岐珍遇事會商先以鼓舞士氣固結人心爲第一要義就近整飭尙屬不難惟臺灣港口林立防營合計則多分布猶薄又不能以財力有限遂昧遠圖至於礮臺欠密軍械欠精雖非目前猝能增易亦應隨時力爲籌購惜有形之財必愈糜無形之財節平時之備必重勞臨時之備則非微臣之所敢出也所有續布臺防緣由謹繕摺密陳伏

乞皇上聖鑒訓示謹奏光緒二十年十一月初一日奉硃批知道了欽此

(二〇四九)軍機處電寄裕祿諭旨

光緒二十年十一月初一日
電寄檔

奉旨據宋慶轉豐陞阿聶桂林電報退出岫巖至老鳳峪稍息兵力等語豐陞阿聶桂林統帶官兵久不得力前已交裕祿確查此次退出岫巖據報斃賊不少究竟是否屬實有無退避捏飾情形著裕祿查明速覆欽此十一月初一日

(二〇五〇)軍機處電寄李秉衡諭旨

光緒二十年十一月初一日
電寄檔

奉旨李秉衡電奏已悉旅順失事沿海一帶口岸處處皆爲要防洋河等處防營礙難抽調出關章高元八營現正會合宋慶堵剿北竄之賊斷不能折回威海仍著李秉衡督飭現有防軍並催省西調募各營迅速到防協力固守毋稍疏懈欽此十一月初一日

(二〇五一)軍機處電寄宋慶諭旨

光緒二十年十一月初一日
電寄檔

奉旨宋慶電奏潰散之勇派員收集等語此項散勇如尙可用應各編營哨仍令隨同勦賊

儻查係羸弱無用又無礮械者卽揀派妥員資遣押解回籍毋令沿途滋事欽此十一月初一日

(二〇五二)廣西按察使胡燏棻奏統籌洋員漢納根呈請召募洋將練兵添船購械

各節摺

光緒二十年十月二十九日
光緒二十年十一月初二日到

頭品頂戴廣西按察使臣胡燏棻跪奏爲統籌洋員漢納根呈請召募洋將練兵添船購械各節恭摺密陳仰祈聖鑒事竊臣於十月二十二日由山海關馳回天津接奉督辦軍務處密札奉旨前據漢納根呈遞練軍節略其說頗多中肯著照所請由督辦王大臣諭知漢納根迅購船械開招新勇召募洋將卽日來華趕速教練成軍一切章程責成臬司胡燏棻會同該員悉心籌畫稟明督辦王大臣立予施行不令掣肘至一切教練之法悉聽該員約束等因欽此密札飭臣欽遵辦理恭讀之下仰見宸謨廣運勝算默操臣一介庸愚膺斯重寄自應勉竭駑鈍稍效涓埃查漢納根所呈節略以倭氛甚熾須選派洋將另練新兵海軍單弱須購置船礮水陸相輔其說誠多中肯臣到津後卽偕漢納根稟商北洋大臣李鴻章將擬購智利國六船之事與洋商補海斯岱先行籌辦旋聞阿根廷國亦有極新快船礮械俱

全洋商連納熟習該國情形電稟督辦王大臣覆准籌購當偕漢納根先後邀同衿海斯岱連納分別議訂合同由北洋大臣分札該洋商等前往兩國設法商購並由臣各籌給川資英金一千鎊又各帶備用定銀二萬鎊卽日成行惟能允售與否及能否刻期來華該商等亦尙無把握此籌購船礮之實在情形也練兵一節臣以時勢急迫十萬人未易驟集當與漢納根再三擬議始定先練三萬人購備五萬人槍械並募洋將八百員約需經費銀一千餘萬兩大略情形業經電請督辦王大臣先行代奏查唐仁廉曹克忠等均在天津招勇爲日已久成軍者不過數營此三萬之衆一時亦恐難齊臣已遴派幹員馳赴山東河南口外朝陽一帶分投招募京津附近地方亦趕緊設法招集務擇年力精壯不准以老弱疲輓之人充數俟招成若干卽豫備操場隨時點交漢納根認真訓練總期早日募齊練成一枝勁旅以備征剿不敢稍涉遲延至購械募將兩事應責成漢納根辦理自倭人肇衅後訂購外洋軍火須先付定銀三分之二洋將來華川資又須全數發給必須戶部迅速指撥的款臣方能與漢納根訂立合同彼此簽押儻遷延日久恐彼有所藉口又難責其刻期到津現將詳細章程實需經費與漢納根悉心籌酌俟條約議妥卽當稟明督辦王大臣核定飭遵此籌辦練兵之實在情形也臣反覆熟慮漢納根練兵募將之說固屬良策而其中辦理棘手

之處厥有數端不得不鯁鯁過慮思患豫防爲之計畫周密敬爲我皇上縷晰陳之據該洋員所呈必須練新軍十萬人方足禦侮然募洋將二千員約需費四百萬兩購買十萬軍械等項約需費二千餘萬兩華洋員弁及兵夫薪餉歲約需費二千一百餘萬兩統共需銀四千餘萬兩而購買快船尙不在內臣深知餉力艱難何能籌此鉅款是以再三斟酌改練三萬人洋將軍械亦從減議辦然綜計所需已非一千餘萬兩不能應付日後養兵之費尙難爲繼刻下舍借洋款別無他策將來償還殊不容易此籌款之難也訂購外洋器械向須約期保險價腳自定議至起運及驗收之日分三次付清遇有戰事雖不能拘以常例亦必須立有範圍該洋員經購軍械旣不能約期又不能保險而價腳須先付一半餘分兩個月付清萬一付銀之後軍械不能運到何敢當此重咎且恐五萬人備用器械洋廠亦未易猝辦緩不濟急事將何補此購械之難也練兵必先選將將得其人而兵始強欲練數萬之師必先得能統數萬人之上將統數千人之偏將統數百人之裨將而平時督操臨陣督戰又在哨官得人此次東征事起各路選將招兵曾經戰事者均已選擇一空以三萬人計之營官須六十人哨官須三百人雖有洋員教練而出羣之材未易猝致此求將弁之難也漢納根於大鹿島之戰雖能出力此次建言本意似欲多購船械爲牟利起見竊恐事權過重所用

洋員過多積久難以鈴束昔唐代安史之亂借兵回紇恢復兩京誠不得爲無功然從此有輕唐之心不旋踵而聯兵入寇可爲殷鑒卽如同治初年李鴻章借洋將戈登剿辦粵匪旋卽桀獫不馴趕緊遣撤尤其明證現雖借材異域冀救目前之急但恐操縱不能由我他時後患更多此約束之難也以上數難臣夙夜焦思恐難勝任伏念時艱孔亟朝廷東顧憂勞迭奉督辦王大臣飭催練兵之事速行定議臣雖智慮短絀曷敢不殫竭血誠仰酬高厚惟此事責任綦重設或辦理未善負疚滋深不得不將爲難情形豫陳宸聽以後俟招募一經成營隨時稟請督辦王大臣核奪遵辦總當和衷共濟使漢納根無掣肘之慮而臣亦得操駕馭之權於事方有實效理合將籌辦詳細情形恭摺由驛密陳伏乞皇上聖鑒訓示謹奏

光緒二十年十月二十九日

（二〇五）附件一 胡燏棻奏請飭部籌撥練兵及糧臺經費片

再臣欽奉諭旨會同漢納根辦理練兵事宜所有雇募洋將訂購軍械以及派員招勇各項經費共約需銀一千餘萬兩此外採買兵米製辦軍裝添購槍礮分設陸路轉運各局均係糧臺專責北洋先後招募新勇六十餘營自十一月分起應領月餉賞卹雜支現改由糧臺

核發通盤籌畫非再添撥銀四百萬兩不敷支放查部撥北洋備倭經費銀四百餘萬早經動用無存其續請添撥之一百二十萬兩係備找付軍火價銀及預籌新募各營五個月餉項自九月以後北洋又有續購大批軍火添募勇營已將前款暫行挪用臣開辦糧臺並未奉撥的款而軍需用項紛至沓來卽如漢納根招募洋將訂購船械均須先付定銀刻不容緩赤手空拳實屬無從籌墊合無仰懇天恩俯准飭部迅速籌撥練兵經費銀一千萬兩糧臺經費銀四百萬兩以應急需仍俟軍務告歲再行分晰開單據實報銷謹附片陳請伏乞聖鑒訓示施行謹奏

(二〇五三)廣西按察使胡燏棻奏看山海關防務擬添築礮臺摺

光緒二十年十月二十九日

頭品頂戴廣西按察使臣胡燏棻跪奏爲察看山海關防務擬添礮臺情形仰祈聖鑒事竊臣於十月十二日馳抵天津業將開辦糧臺刊用關防緣由奏報在案十九日偕同洋員漢納根乘坐火車馳赴山海關連日與該洋員周歷關內關外沿海一帶逐細考察勘該關爲奉直鎖鑰面海枕山險要天然足可扼守東南迎海一面原築大礮臺三座深得形勢敵船斷

難窺伺駐防各營星羅碁布聲勢亦甚聯絡惟據漢納根聲稱現駐關外距長城之五里山後各營臨海過近若敵船用子彈母攻擊則該處營壘恐不能守擬將面海北邊之礮臺上原設十二生持礮二尊八生持陸路礮八尊均移至臺之北面安設以護東北陸路各營臺北牆邊添挖步隊長溝兼護山坡此爲山海關之右路又查距關外七八里地名紅牆子該處地勢甚高擬添築行營大礮臺一座安設十二生持礮四尊八生持礮八尊駐兵兩營臺牆兩邊亦開挖步隊長溝以護坡陀則周圍小山及山窪處所均有照應此爲山海關之中路又查關外西北之山高至十餘里中皆曠野無庸築臺惟長城殘缺甚多山徑叢雜敵人易於攀越現在靠山之威遠城已築礮臺應再添設八寸徑陸路八尊臺之兩邊亦挖步隊長溝以資防護此爲山海關之左路照此布置中左右三路合成偃月之勢各營扼紮腹內四面皆可顧及惟距威遠城八九里外山頭舊有烟墩臺一座聞係前明修建地形極高又極堅固恐爲敵人所據用礮俯擊則關外各營均難立足若能將此烟墩拆去另築礮臺安設巨礮既可護關前所築之三臺兼可杜敵入喜峯口之旁路估計工程非三四個月不能完峻急切碍難議辦現擬於威遠城旁路小山上安設田雞礮數尊以護墩臺並於墩臺後路埋伏地雷防敵爭奪最爲要著又查關內有石河一道自山橫流入海河外一望平原卽

屬秦王島之海岸應於沿河添築行營礮臺四座每處駐兵一營安設陸路礮或四尊或六尊以防敵人登岸偷渡其東接面海之東南礮臺應於臺之南面安設陸路礮位以護內地又靠山之二郎廟小山上應添築行營礮臺一座駐兵兩營安設陸路礮六尊俾關內各營臺亦成偃月之勢表裏一律鞏固敵人無從飛越等語臣復詳加考核並與現辦鐵路工程久在榆關之記名提督周蘭亭悉心討論該洋員籌議各節深合機宜自應照議辦理旋於二十二日回津稟商北洋大臣李鴻章亦以爲然此項工程本可責成該處防營建造祇以新募各軍正須操練未遑工作當商明提督周蘭亭就近僱工按照所擬做法趕緊興辦統限半月內一律告成俟工竣後仍令漢納根前往驗收布置紅牆子礮臺在江蘇臬司陳湜老湘營之前即可歸該營駐守其石河東岸五臺尙無防營駐紮應請准由周蘭亭招募礮兵五哨分段駐守俟湘鄂各軍到齊再行酌撥分駐築臺經費應由糧臺核發彙案報銷移設礮位調派營勇均由北洋大臣轉飭遵照除大概情形前已電請督辦軍務王大臣轉奏外所有察看山海關防務添築礮臺緣由理合恭摺具陳伏乞皇上聖鑒訓示謹奏光緒二十年十一月初二日奉硃批另有旨欽此

(二〇五三) 附件一 胡燏棻奏乘此嚴冬齊集各軍合力並進片

再山海關防務業經臣將添築礮臺情形另摺奏明在案查駐關各營除吳鳳柱李光久兩軍調赴前敵外尚有湖南撫臣吳大澂四營江蘇臬司陳湜十營合之下得祥所部各營防守似已有餘現在關外奉直陸路大道添築紅牆子礮臺一座足遏其衝關內石河東岸添築礮臺五座又可截秦王島偷渡之路將來魏光燾熊鐵生余虎恩等三十餘營到齊後似應酌分一半扼紮灤州石門寨地方以備迎擊其餘飭令出關進紮甯遠錦州一帶遙爲援應如此布置不獨榆關可保無虞卽京畿門戶亦有屏蔽似不必庸聚一隅轉置有用爲無用近日奉天軍情緊急岫巖旅順相繼失守宋慶兵力過單腹背受敵殊爲可慮北洋瞬將封凍沿海戒備稍鬆曹克忠新募三十營年內當可成軍津沽一帶堪資捍衛擬請將察哈爾馬隊及吳宏洛一軍於封河後迅速馳赴前敵統歸宋慶調遣以厚兵力現值嚴冬兵輪行駛不便倭逆轉運必多艱阻宜乘此時齊集各軍合力並進則軍事或有機轉若再遷延觀望瀋陽設有疏虞明歲春融冰泮敵必大舉來犯卽使臣與漢納根所練之兵倖而成軍備多力分亦難措手臣愚昧之見是否有當謹附片具陳伏乞聖鑒訓示施行謹奏

(二〇五三)附件二 胡燏棻奏饋運餉械情形片

再軍行以饋運爲先臣奉旨駐津辦理糧臺自應認真籌畫查前敵轉運業經直隸臬司周馥津海關道盛宣懷設局派員經理而後路轉運亦關緊要現距封河之期不遠所有外洋訂購軍火及長江上游各省協濟餉械運到上海必經由陸路轉運方免貽誤上海至清江浦均係水路尙可用船裝載惟由清江浦起旱至天津陸路一千六百餘里必需車輛運送東道經過山東泰安等處嶺路崎嶇車行顛簸精巧槍械恐有損壞擬改走西道由清江浦至徐州歷山東之兗州東平德州直抵天津雖路稍繞越而道途一律平坦車輛暢行無阻現於上海鎮江清江徐州東平德州六處遴派委員馳往設局雇備車船分批解送每局相距不過四百里上下地段分割均勻接遞較爲迅速運抵天津仍交前敵轉運局遞送各營設局地方及沿途經過處所已呈請北洋大臣李鴻章分咨各省督撫轉飭文武營汛幫同照料妥辦並就近酌撥防營守護狎送以昭慎重應需經費由糧臺按月發給俟軍務平定飭令核實報銷理合附片陳明伏乞聖鑒謹奏光緒二十年十一月初二日奉硃批知道了欽此

(二〇五四)軍機處電寄裕祿宋慶諭旨

光緒二十年十一月初二日
電寄

奉旨李鴻章裕祿電奏均悉。呂士成呂本元孫顯寅耿鳳鳴等進剿倭賊收復連山關並追賊至分水嶺陣斃倭先鋒將軍官富岡三造現仍會商進剿等語。此次各軍同心敵愾乘夜奪關並陣斃敵將實屬異常奮勇。呂士成呂本元著各賞給白玉翎管一枝小刀一柄大荷包一對小荷包二箇其餘出力將弁及團練響導人等著裕祿宋慶查明分別保獎。各軍士嚴寒苦戰著加賞銀一萬兩以示鼓勵。欽此十一月初二日。

(二〇五五)軍機處寄北洋大臣李鴻章等上諭

光緒二十年十一月初二日
洋務檔

軍機大臣字寄北洋大臣李鴻章南洋大臣張盛京將軍裕幫辦北洋軍務四川提督宋光緒二十年十一月初二日奉。上諭有人奏此次倭船逼攻旅順已預知埋藏水雷之所曲折繞避竟無一艦碰傷且當前軍戰酣之際後營突然火起遂至軍心震擾凡被賊攻陷之地無非漢奸導引所致等語。著李鴻章張之洞知照沿海各省督撫嚴飭地方文武實力稽查搜捕淨盡以杜勾引之患。奉天各軍著裕祿宋慶一律督飭嚴查勿稍疏忽將此各諭令知之。欽此。遵旨寄信前來。

(二〇五六)翰林院侍講學士四川學政瞿鴻禨奏不可輕與倭人言和摺

光緒二十年九月十八日
光緒二十年十一月初三日 到

翰林院侍講學士四川學政臣瞿鴻禨跪奏爲倭人犯順不可輕與言和宜伸撻伐以振國威而弭外侮披瀝上陳仰祈聖鑒事竊本年四月以來日本擾亂朝鮮侵我藩服鳴張狂悖聞者無不憤恨切齒人人有同仇敵愾之思伏讀邸鈔七月初一日奉上諭倭人渝盟肇畔無理已極勢難再予姑容著李鴻章嚴飭派出各軍迅速進剿厚集雄師陸續進發以拯韓民於塗炭並著沿江沙海各將軍督撫及統兵大臣整飭戎行遇有倭人駛入各口卽行迎頭痛擊悉數殲除等因欽此率土臣民咸欽服朝廷之明斷無論武夫文吏皆以爲天威一震不獨能殄倭寇之氛且將以寒羣夷之膽聖謨深遠誠萬全之勝算也乃近日傳言謂李鴻章以英俄兩國從中調停注意講和聞諸道路不知信否萬一有之甚爲失計不可輕許往者法人構難馮子材劉永福諸軍大捷於關外方有乘勝驅除之機款議遽成事會可惜聞各路軍營士卒猶有奮往直前不甘中止者經統兵將帥再三曉譬資以遠旨大義而後翕然足見我國家深仁厚澤洽乎民心是以固結而不可解如此今倭人之可痛恨與法事